

**RIBS buka Kedai Ikan Rakyat 1Malaysia  
Utusan Online  
December 10, 2011**

KUALA LUMPUR 9 Dis. - Selaras dengan usaha kerajaan untuk menurunkan harga barang makanan di negara ini, Restoran Sekinchan Ikan Bakar tampil dengan inisiatif baru membuka Kedai Ikan Rakyat 1Malaysia (KIR1M).

Pengasasnya, Datuk Jamal Yusof berkata, kedai yang terletak di Plaza Centrum, Setiawangsa itu berkonsepkan seakan-akan Kedai Rakyat 1Malaysia dan menawarkan harga kira-kira 30 hingga 40 peratus lebih rendah berbanding harga ikan di pasaran.

Menurutnya, bagi membantu golongan berpendapatan rendah, KIR1M menjual lima jenis ikan iaitu ikan kembung, selar, selayang, cencaru dan ikan pelaling.

"Kesemua ikan yang dijual di sini dibawa terus daripada nelayan dan pembekal tanpa melalui orang tengah. Ia adalah salah satu faktor kami mampu menjualnya dengan harga yang murah," katanya pada sidang akhbar selepas majlis pelancaran kedai itu di sini hari ini.

Majlis tersebut disempurnakan oleh Timbalan Ketua Setiausaha (Perancangan) Kementerian Pertanian dan Industri Asas Tani, Raihan Sharif.

Tambah Jamal, selain menjual ikan, kedai tersebut juga menjual produk-produk runcit lain seperti buah-buahan, sayur-sayuran, ayam, daging dan barangan kering yang didapatkan terus daripada pengusaha industri kecil dan sederhana (IKS).

Katanya, kedai itu beroperasi dari pukul 6 pagi hingga 10 malam setiap hari.

Beliau juga bercadang membuka tiga lagi cawangan KIR1M di Mahkota Cheras, Tasik Permaisuri dan Setapak sebelum akhir tahun ini.

"Kami sedang memikirkan untuk membuka 30 cawangan lagi pada tahun depan," ujarinya.

Sementara itu Raihan berkata, kementerian akan terus membantu pihak swasta untuk memasarkan serta mendapatkan bekalan daripada agensi yang berkaitan.

Jelasnya, kementerian juga akan terus memantau kedai tersebut bagi mengelakkan sebarang rungutan daripada pengguna.

"Kita perlu ingat harga yang murah tidak semestinya sesuatu barang itu tidak berkualiti," tambahnya.

Hakcipta Terpelihara © UTUSAN MELAYU (M) BERHAD

Source:

[http://www.utusan.com.my/utusan/info.asp?y=2011&dt=1210&pub=Utusan\\_Malaysia&sec=Dalam\\_Negeri&pg=dn\\_12.htm](http://www.utusan.com.my/utusan/info.asp?y=2011&dt=1210&pub=Utusan_Malaysia&sec=Dalam_Negeri&pg=dn_12.htm)